

太平寰宇記

第二册

上

十

一

一

一

一

一

一



太平寰宇記卷之三

河南道三

西京一

河南府

河南府古洛州

今理河南洛陽二縣

禹貢豫州之域星分柳宿

爲周之始都按博物志云周在中樞三河之分風雲所起四險之國也昔周武王克殷還顧瞻河洛而嘆曰我南望三塗北望嶽鄙顧瞻有河粵瞻雒伊毋遠天室遂定鼎郊鄔以爲東都周書又曰周公將致政乃作大邑南繫于洛水北因于郊山以爲天下之大湊也皇甫謐帝王世紀云周公相成

王以豐鎬偏在西方職貢不均乃使召公卜居澗水東澶水之陽以卽中土而爲洛邑而爲成周王都今苑內王城是也又按孝經援神契云八方之廣周洛爲中于是遂築新邑營定九鼎以爲王之東都又云成王營洛邑建明堂朝諸侯復還豐鎬故書序曰成王旣黜殷命還歸在豐周公往營之後始遷殷頑民居之河南府東故洛城是也自成王後十世幽王爲犬戎所殺其子平王居洛邑所謂新邑也平王後十三葉敬王避王子朝之亂東居成周成周城小不受王都故壞翟泉而廣焉敬

王後十一葉赧王又徙居于西周卽王城今苑城  
內是也皇甫謐帝王世紀云赧王盡獻其邑三十  
六于秦秦昭襄王納其獻立爲三川郡初理洛陽  
後徙滎陽自平王東遷至赧王凡二十四葉而周  
氏滅矣漢書地理志云初洛邑與宗周通封畿東  
西長而南北短短長相覆爲千里至襄王以河內  
賜晉文公又爲諸侯所侵故其分地小徐廣注史  
記云周比亡凡七縣河南洛陽穀城平陰偃師鞏  
緱氏是也楚漢之初立韓公子成爲韓王其地屬  
韓漢元年項羽立楚將瑕邱公申陽爲河南王都



洛陽二年陽降漢漢于其地置河南郡領縣二十

二理洛陽漢高祖五年即位定陶自洛陽徙都長

安後漢建武元年幸南宮遂定都焉至五年改河

南郡為河南尹領二十一縣屬司隸校尉獻帝即

位關東兵起相國董卓遂逼遷西都長安盡燒洛

陽宮廟曹子建詩云步登北邙坂遙望洛陽山洛陽何寂寞宮室盡燒燔後卓死

又都焉至建安元年曹公進兵詣京師帝遂南都

于許魏受禪都洛陽陳留王奐合河南等五郡置

司州十三州志云京師之州司隸校尉掌焉故曰

司州晉受禪又都洛陽司州不改永嘉五年劉曜

王彌入京師于是司州沒胡劉聰以洛陽爲荊州  
石季龍又改爲司州建武元年分司州之河南等  
七郡爲洛州東晉永和五年桓元子入洛陽復置  
河南郡屬司州苻堅使王猛克洛陽改司州爲豫  
州後秦不改宋武帝入洛更置東垣西垣二縣仍  
于虎牢置司州後魏神麿音嘉三年遣將安頡攻洛  
陽拔之復爲洛州太和十七年又改洛州爲司州  
十九年改河南郡爲河南尹孝武帝自洛陽遷都  
長安是爲西魏孝靜帝自洛陽徙都鄴是爲東魏  
按郡國縣道記云東魏天平元年又改司州爲洛

州改河南尹爲河南郡西魏大統三年復收洛陽  
又改洛陽爲司州仍置牧司州尋陷入高齊司州  
不改又移河南郡于澠池縣大塢城置尋又改司  
州爲洛州河南郡唯領宜遷一縣後周建德六年  
平鄴之後于河陽置洛州總管仍省東魏及高齊  
兩河南郡改宜遷爲河南縣仍于洛陽置洛陽郡  
大象元年移相州六府于洛州以爲東京仍廢河  
陽總管隋初仍舊置總管二年廢總管置河南道  
行臺省并罷洛陽郡置洛州以郡舊領縣屬焉大  
業元年煬帝命僕射楊素等營構宮室大業二年



遂成新都而徙居之今洛陽宮是也其宮北據邙山南直伊闕之口洛水貫都有河漢之象東去故城一十八里初煬帝嘗登邙山觀伊闕顧曰此非龍門耶自古何因不建都于此僕射蘇威對曰自古非不知以俟陛下帝大悅遂定議建都焉其宮室臺榭宇文愷所創也愷巧思絕倫因此制造頗窮奢麗前代都邑莫之與比仍以洛州移入新都廢州在宮城南又改爲豫州置牧三年罷州爲河南郡仍置尹四年改東京爲東都十二年煬帝幸江都留越王侗留守十四年煬帝崩立越王侗于



洛復置洛州侗尋爲王世充所害充改洛州爲司  
州唐武德四年討平王世充復爲洛州置總管府  
領洛鄭熊穀嵩管伊汝魯九州洛州領河南洛陽  
偃師鞏陽城緱氏嵩陽陸渾伊闕等九縣其年罷  
總管府置陝東道大行臺九年罷行臺置洛州都  
督府領洛懷鄭汝四州權于府置尙書省貞觀元  
年割穀州之新安來屬七年又割穀州之壽安來  
屬八年移理所于河南縣之宣範坊十八年廢都  
督府省緱氏嵩陽二縣顯慶二年置東都官員一  
準雍州是歲廢穀州以福昌永寧長水澠池四縣

懷州之河陽濟源溫王屋鄭州之汜水來屬龍朔  
二年又以許之陽翟鄭之密縣絳之垣縣來屬乾  
封元年以垣縣隸絳州咸亨四年又置柏崖大基  
二縣其年省柏崖縣上元二年復置緱氏縣永淳  
元年復置嵩陽縣光宅元年改東都爲神都垂拱  
四年置永昌縣載初元年置武臨縣天授元年置  
武泰縣尋廢仍改鄭州之滎陽爲武泰來屬三年  
置來庭縣神龍元年改神都復爲東都廢永昌來  
庭二縣改武泰爲滎陽還鄭州先天元年置伊闕  
縣開元元年改洛州爲河南府二十二年置河陰

縣天寶元年改東都為東京朱梁開平初都汴州  
廢西京為雍州仍改東京為西京後唐同光元年  
復為東都晉高祖天福三年又都汴州此為西京  
自漢周至于皇朝皆因之

元領縣二十六 今十八

河南 洛陽 登封 缺 壽安 缺 伊闕 缺 永

寧 缺 長水 缺 新安 缺 福昌 缺 伊陽 鞏

縣 密縣 澠池 緱氏 潁陽 王屋 河清

偃師

六縣割出



陽翟

州入許

河陰

已下五縣入孟州

河陽

溫縣

濟

源  
汜水

二縣廢

陸渾

併入伊陽

告成

併入登封

府境

東西三百四十里

南北三百四十里

四至八到

東至東京四百六十里

西至長安八百六十里

東至鄭州二百七十里

南至汝州一百八十里

西至陝州二百五十五里

北至澤州二百里

一作八十

東南至許州三百二十里

西南至虢州四百六十五里

西北至絳州五百里

東北至懷州一百四十里

戶

唐開元領縣二十六戶十九萬四千七百四十六  
皇朝領縣十八戶主四萬二千八百一十八客三

萬九千一百三十九

風俗

周禮職方氏河南曰豫州豫者逸也言常安逸也  
李巡曰豫者舒也言稟中和之氣性理安舒又漢  
書地理志周人巧偽趨利貴財賤氣高富下貧熹  
爲商賈九州記云洛陽轉轂百數賈耽郡國志云  
無所不至

姓氏

河南郡九姓 賀 邱 褚 祝 蘭 竇 南  
宮 穆 獨孤



人物

許由 字武仲 登封人 申伯 洛陽人 詩惟嶽降神 仲山

甫 洛陽人 詩保茲天子 生仲山 甫補之 蘇秦 洛陽人 讀

睡引錐刺股後遊 賈誼 洛陽人 遷大中 大 司

趙說 六國受相印 馬遷 劇孟 洛陽人 以俠顯文帝時 吳楚告變 周

事而不求劇孟吾 卜式 河南人 拜緱氏 郭賀

知其無能為已 杜密 字周甫 登封人 北海相 罷歸 每謁

洛陽人 吳雄 字季高 河南人 官廷尉 少貧 死喪事 促辦

必滅而子祈孫恭 胡昭 居陸渾山 躬耕力學 閭

並三世為廷尉 韓擒虎 平陳有功

至陸渾相戒曰 胡居士賢者

不得犯其境 合邑賴昭以安



疾篤時有人詣其家曰我欲見閻羅王虎  
唐長

孫無忌 洛陽人佐太宗定天下 閻羅王足矣  
賈曾 洛陽人為

制誥 于志寧 河南人 張說 字道濟 策賢良第一封  
居河東又徙家為 賈至 曾子玄宗傳位至撰冊

子可謂 元德秀 字紫芝 河南人少孤事母孝嘗  
繼美乎 隱居陸渾山中無墻垣扇鑰歲

饑或不爨以彈琴自娛房瑄每謂  
見紫芝眉宇使人名利之心都盡 房瑄 字次律

長才博學風度修整 武元衡 緱氏  
與韋見素同平章事 元稹 字微之 河南人

人性高潔能詩為蘇州刺 元稹 字微之 河南人  
史多惠政世號韋蘇州 元稹 字微之 河南人

詩與白居易齊 畢誠 字存之 偃師人燃薪夜讀  
名世稱元白 達旦官學士進大司馬

蕭昕 賈餗 河南人 裴休 濟源人 曹確 河南人

土產

桑白皮 桔梗 元參 丹參 旋覆花 大戟

白蠟 半夏 芫花 峭粉已上並入貢 瓷 鍾

乳 賦綾絹 九州記云金門之竹可以為笙管

金門山名 在福昌縣

河南縣舊四十五鄉今四鄉五十坊 漢書地理志河南故邾鄆地邾

山名鄆邑名今邑西南之地謂之邾鄆中按周平

王避犬戎亂自宗周徙居于此歷十三世至敬王

乃遷都成周即此也秦滅漢為縣屬河南郡後漢

亦為河南縣歷魏晉及後魏皆理于今苑城東北

偶後周大象二年移于故洛城西隋大業二年又  
移于今洛城內寬政坊卽今理所也尋又改洛州  
爲豫州三年罷州爲河南郡縣屬不改唐永昌元  
年改爲合宮縣至神龍元年復舊二年十一月又  
改爲合宮縣唐隆元年仍舊爲河南縣 洛水在  
縣北四里 伊水在縣東南十八里 瀍水在縣  
西北六十里禹貢曰伊洛瀍澗旣入于河孔安國  
注云瀍水出河南北山水經云瀍水出河南穀城  
縣北山今驗水西從新安界東入縣界 天津橋  
在縣北四里隋煬帝大業元年初造此橋以架洛



水用大纜維舟皆以鐵鎖鈎連之南北夾路對起  
四樓爲日月表勝之象然洛水溢浮橋輒壞唐貞  
觀十四年更令石工累方石爲腳爾雅箕斗之間  
天漢之津梁故取名焉 中橋唐咸通三年造累  
石爲腳如天津之制 通濟渠在縣南三里隋大  
業元年分洛水西北名千步磧渠又東北流入洛  
水謂之洛 金谷郭緣生述征記云金谷谷也地  
有金水自太白原南流經此谷晉衛尉石崇因卽  
川阜而造爲園館崇金谷詩序云余以元康六年  
從太僕卿出爲征虜將軍有別廬在河南縣界金

谷澗中有清泉茂樹眾果竹柏藥物備具又水碓  
魚池焉時與諸賢登高臨下列坐水湄遂各賦詩  
感性命之不永懼凋落之無期云 芒山一作邛  
山在縣北十里一名平逢山亦邾山之別名也都  
城所枕又有光武陵魏明帝欲平北邛山令登臺  
便觀見孟津廷尉辛毗諫曰天地之性高高下下  
今而反之旣非其理若九河盛溢洪水爲害邱陵  
皆夷何以禦之帝乃止又楊銓期洛城記曰北山  
連岸修亙四百餘里實古今東洛九原之地也又  
戴延之西征記邛山西岸東垣亙阜相屬其下有

張母祠卽永嘉中此母有神術能愈病故元帝渡江時延聖火于丹陽卽此母今祠存伊尹蘇秦張儀扁鵲田橫劉寬楊修孔融吳後主蜀後主張華嵇康石崇何晏陸倕阮籍羊祜皆有家在此山後漢梁鴻登芒山作五噫之歌曰陟彼北芒兮噫顧覽帝京兮噫宮室崔巍兮噫人之劬勞兮噫遼遼未央兮噫 周山今在苑中當縣之西也皇覽云河南城內有周山一名小亭山周地記云周山下有周谷卽本周之采地也 穀城山瀍水所出 太白原其原邛山之異阜也在縣西北六十八里



輿地志云金水始自太白原東南經金谷卽此原也 佩印山曹魏諸陵並在此山上卽芒山之別阜也 闕塞山左氏傳晉趙鞅納王使女寬守闕塞服虔謂南山伊闕是也杜預注洛陽西南伊闕口也俗名龍門 孝水山海經謂廆音瑰山俞隨之水出于其陰北流注于穀水水經注云世謂之孝水在河南城西十餘里故潘安仁西征賦云澡孝水而濯纓嘉美名之在茲 月陂洛水自苑內上陽宮南瀾漫東注當宇文愷版築之時因築斜堤東令東北流當水衝作堰九所形如偃月謂之月



陂 千金堰戴延之西征記云金漚穀三水合處  
有千金堰卽魏陳思王所立引水東灌民今賴之  
又九州要記云洛陽千金堰傍有九龍祠 濛汜  
池魏書云明帝于宮西鑿濛汜池以通御溝義取  
日入濛汜以爲名 瓊華池洛陽宮殿簿云西宮  
臨章殿有瓊華池 皋門橋穀水上有皋門橋卽  
晉惠帝所造故潘岳西征賦云秣馬皋門 銅井  
陸機洛陽記云宮殿西有二銅井 甘城左傳謂  
甘昭公有寵于惠后杜預注云河南縣西南有甘  
水昭公王子帶食邑于甘故漢書郡國志云河南

有甘城 故穀城在縣西北古穀城卽周所置在  
穀水之東岸西晉省併入河南故有城存北齊天  
保中常山王演使裨將嚴略增築以拒周俗謂之  
嚴城後周拒齊又築孝水戍亦在今縣西北隋大  
業二年又于此置青城宮隔苑城與榆林店相對  
萇弘祠郡國志云弘周人無辜見殺今洛中有  
祠存謂撞鍾祠是也卽後人訛爾 白君祠郡國  
志云漣水西南有白仲理墓前有祠堂石碑題曰  
真人白君之表卽晉永寧二年誌之 許由廟在  
邑界 石虎郡國志云在洛陽西秦末嘗鳴應三

十里今人鐵釘釘兩足兼截雙耳 金埒在北邙

山下按劉義慶世說王濟字武子被謫移第于此

時人多地貴濟好走馬因布錢爲埒以示之故號

爲金埒 鴻都門洛陽北宮門也 百尺樓在金

墉城內 金墉城在故城西北角魏明帝所築洛

陽地圖云金墉城內有百尺樓 棠棣碑在縣西

四里修行寺東街永徽初賈敦頤弟敦實前後爲

洛州長史並有惠政百姓立二碑于此時人號爲

棠棣碑 白居易影堂在縣南二十里唐會昌元

年置 玉泉山在縣東南四十里山內有玉泉寺



唐明宗五廟在縣西北六里福善坊 晉朝五

廟在縣西北八里恭安坊天福八年置 漢朝七

廟在縣西北八里旌善坊 周朝六廟在縣西南

三里彰義坊建隆元年置 唐李靖廟在縣西七

里精善坊

洛陽縣

舊三十鄉今三鄉四十三坊

本成周之城周鎬京爲西都

王城爲東都敬王後王城爲西周成周爲東周至

秦襄王以爲洛陽縣屬三川自漢以後縣屬河南

故太史公云留滯周南卽今邑也朱超石與兄書

曰洛下道路本好青槐蔭映可愛隋煬帝遷都自

今縣東三十里移于今德懋坊西南隅有故城存  
唐垂拱四年七月析置永昌縣長安二年六月廢  
永昌神龍二年冬改洛陽爲永昌縣唐隆元年復  
爲洛陽縣至皇朝移于小清化坊 洛水在縣西  
南三里西自苑內上陽之南瀾漫東流宇文愷築  
斜堤束令東北流當水衝湊堰九所形如偃月謂  
之月陂今雖漸壞尙有存者 北邙山在縣北二  
里 委粟山在縣東南三十五里魏明帝景初元  
年十月營洛陽委粟山爲園邱今形制猶存 大  
石山一名萬安山在縣西南四十五里九州要記

云晉惠帝于此山請雨七日大霖魏孝文帝測之  
高二百丈魏武樂府有南篇云南上大石山卽此  
山也 大谷在縣東五里後漢書云孫堅進軍大  
谷距洛九十里張衡東京賦曰盟津達其後大谷  
通其前陳思王洛神賦云經通谷潘岳閑居賦云  
張公大谷之梨皆謂此 翟泉左傳云王子虎會  
諸侯之大夫于翟泉今城中太倉之西南池水是  
也晉永嘉元年有蒼鳥起步廣里地陷竟有劉曜  
篡逼之辱又帝王紀云景王葬于翟泉今東陽門  
內有大街北有太倉中有景王陵西南望步廣里



北眺翟泉二處相距遠近略均之也又戴延之西  
征記云太子宮東有翟泉今乾無水 洛子神郡  
國志後魏虎賁中郎將洛子淵者洛陽人鎮防彭  
城因同營人樊元寶歸附書至洛下云宅在靈臺  
南元寶至忽見一老翁云是吾兒書引入屋宇顯  
敞飲食非常久之送元寶出唯見高崖對水方知  
是洛水之神因立祠迄今人祀以祈水旱 玉井  
魏略云明帝引穀水過九龍祠前爲玉井綺欄又  
洛陽記云璇華宮有玉井皆以白玉壘飭是也  
阮曲水經注云穀水又東南轉曲而東注謂之阮



曲蓋嗣宗所居之地 七里澗陸機洛陽記云城  
東有石橋以跨七里澗 九觀陸機洛陽記云臨  
商陵雲等八觀在宮之西惟絕頂一觀在東是號  
曰九觀 平陰故城漢爲縣廢城在今縣北五十  
里是按此城東有平川謂之河陰川城北枕黃河  
西抵邙山北趾曹魏文帝改河陰後魏移縣理于  
故洛城西皇女臺側隋開皇三年又移縣于壽安  
縣東北二十五里嚴明城是也大業元年廢併入  
洛陽 峻陽陵晉武帝陵 漢明章二帝陵明帝  
在今縣西北章帝在今縣東南 白社里在故城

建春門東卽董威輦舊居之地 迴洛倉隋大業

三年十二月置迴洛倉南去洛陽縣七里倉城周  
十里開三百窖米百萬斛至十三年李密叛頻攻  
此倉多爲洛人所據後竟爲密陷還復奪得後運  
米入洛終爲亂兵所掠 宣武場魏明帝鬪猛獸  
處 銅駝街陸機洛陽記云漢鑄銅駝二枚在宮  
南四會道夾路相對俗語云金馬門外聚羣賢銅  
駝陌上集少年言人物之盛也風土記云石季龍  
取之向鄴 三市洛陽記云大市名金市在大城  
西南市在大城南馬市在大城東按金市在臨商

觀西兌爲金故曰金市馬市在東舊置丞焉又酈道元注水經云馬市卽嵇康爲司馬昭所害之處

蘇秦宅郡國志云在利仁里後爲後魏尙書高

顯業宅每夜顯業見赤光于光處掘得金百斤銘

曰蘇秦金顯業因爲之造寺董卓宅又郡國志

云在永和里掘地輒得金玉寶玩後魏邢巒掘得

丹砂及錢銘曰董太師之物後夢卓索巒恠同不

還經年無疾而卒石崇宅有綠珠樓今謂之狄

泉是也夕陽亭晉賈充出鎮長安百僚餞送自

旦及暮故曰夕陽亭故洛陽城在縣東二十里



按洛陽記洛陽城東西七里南北九里城內宮殿  
臺觀府藏寺舍晉魏之代凡有一萬一千二百一  
十九門自永嘉之亂劉曜入洛陽元帝渡江官署  
里閭鞠爲茂草至後魏孝文帝幸洛陽巡故宮遂  
咏黍離之詩羣臣侍從無不感愴又至隋煬帝因  
校獵登北邙山觀伊闕顧謂侍臣曰得非龍門耶  
自古何不建都于此侍臣蘇威對曰以俟陛下耳  
遂議建都焉因詔楊素營之大業九年成徙都於  
其宮北據邙山南值伊闕以洛水貫都有天漢之  
象其宮室臺殿皆宇文愷所創巧思營布前代都

邑莫與比焉 十二門陸機洛陽記云洛城十二  
門北九里城內宮殿臺觀有闔闔左右出入城內  
皆三道公卿尙書從中道凡人左右出入不得相  
逢夾道中植榆柳以蔭行人又晉書云洛陽御道  
築墻高丈餘又云洛陽十二門皆有雙闕石橋橋  
跨陽渠水又按輿地志洛陽城外四面有陽渠水  
卽周公所制池上源注函谷東流注城西北角仍  
分流繞城至建春門外合流又折而東流注于池  
是也 上東門洛陽東面門也在寅地晉改爲昌

門

一作建春門

東觀漢記云邳暉爲上東門候光武夜

還憚不納又後漢書袁紹橫刀揖董卓曰天下健者豈惟董公乎乃懸節于上東門而去又漢公卿餞二疏于上東門漢舊儀云册皇子為諸侯王皆于上東門中以東門在卯故也晉書十二門東面最北曰上東門後又改為東陽門即阮籍詩步出上東門也又晉書王衍見石勒倚嘯于上東門徐使召之已去 開陽門南面有四門東曰開陽在已上應劭漢官儀曰此門始成未有名夜有一柱飛來在樓上後琅邪開陽縣上言南門一柱忽然飛去莫知所在光武使視則是也遂刻記年月日



因以名門上有九子母像國家常往祈焉次西漢  
曰平城門在丙上晉改曰平昌門郊祀法駕由此  
門次西漢曰小苑門在午上晉改曰宣陽門門內  
有冰井故述征記曰冰井在陵雲臺北古藏冰處  
也又云謬音移門卽宣陽門也按辭綜注東京賦曰  
謬門冰室門也冰室門及榭皆屈邪行依城池爲  
道也華延雋洛陽記云卽漢之宮門次西漢曰津  
門在未上當洛水浮橋下按後漢書陳宣爲諫議  
大夫建武十年洛水泛長至津門門司欲築堤遏  
水宣止之曰王尊正己水絕其足朝廷中興必不

入矣水果止 廣陽門西面有三門門在申上述  
 征記云廣陽門西南有劉曜壘試弩棚西北有鬪  
 雞臺射雉觀又按河南十二縣境簿云繭觀在廣  
 陽門次北漢曰雍門在西上晉改曰西明門又次  
 北曰上西門在戌上晉改曰闐闔門按漢官儀云  
 上西門所以不純白者漢家厄于戌故以丹漆鏤  
 之 夏門北面有二門其西漢曰夏門晉改爲大  
 夏門又在亥上魏略云董卓燒南北二宮魏武帝  
 更于夏門內立北宮至明帝又造三層樓高十丈  
 陸機與弟書云大夏門有三層樓高百尺又按晉

宮闕簿云宣武觀在大夏門內東北上故云南望  
天淵池北矚宣武場是也次東者漢曰穀門晉改  
爲廣莫門正在丑上 九龍祠在履順坊按東都  
記後魏孝文遷都洛陽于此修千金竭渠成而水  
不流常見有龍扼之水不得下于是祭之龍退而  
水行 王戎墓在殖業坊高四丈故老傳云隋大  
業遷都之始人爲酒窖得銘曰晉司徒尙書令安  
豐元侯王君之墓銘 裴楷墓在修義坊十字街  
北有碑存 高貴鄉公陵在縣西北三十里屈澗  
之濱



太平寰宇記卷之三終

太平寰宇記卷之五

河南道五

西京三

伊陽縣

南二百六十里  
舊三鄉今四鄉

本陸渾地唐先天元年十二

月割陸渾縣置伊陽縣在伊水之陽去伊水一里

女几廟在縣西三十里 鳴皋山在縣東三十

里 鳴皋廟則天立 石扇山在縣南三百里有

石如扇 龍駒澗在縣北一十二里 王母澗在

縣西南六里 蠻王城在縣南五十里 新羅王

子陵在縣東北七十里高二百丈 元魯山墓有

碑見存在縣北二十五里李華文李陽冰篆額顏

真卿書魯山有德行呼爲四絕碑 湯泉在縣南

一百三十里卽四眼湯

鞏縣

東南三十里舊四鄉今三鄉

郭緣生述征記云鞏縣周之鞏

伯邑春秋左氏傳晉師克鞏遂王子朝杜預注云周地河南鞏縣也史記周顯王二年西周惠公封少子班于鞏以奉王號東周皇甫謐曰以王城爲東周以鞏爲西周其子武公爲秦所滅秦莊襄王元年韓獻成皋鞏秦界至大梁漢以爲縣屬河南郡晉宋不改李密自潁川率羣盜十餘萬襲破洛口倉因據鞏縣仍築城斷洛川包南北山周迴三



十里屯營其中後爲王世充所破縣本與成皋中  
分洛水西則鞏東則成皋後魏始併焉 黃河西  
自偃師縣界流入河于此有五社渡又爲五社津  
後漢朱鮪遣賈強從五社津渡是也 天陵山在  
縣南六十里潘岳家風詩所云天陵巖謂此也  
侯山在縣南二十五里盧元明嵩山記云漢有王  
彥者隱于此山景帝累徵不出遂就而封侯山因  
爲名後學道得成至今指所住爲王彥崖 九山  
在縣西南五十五里水經注桐澗水北流經九山  
東仲長統云昔密有卜成者身遊九山之上放心

大平寰宇記卷之五  
不拘之鄉謂此山也山際有九山廟碑晉永康二  
年立文曰九山府君太華元子之稱也 岑原邱  
在縣西北三十五里水經注云鞏縣北有山臨河  
謂之岑原邱下有穴謂之鞏穴言山潛通淮濟北  
達于河直穴有渚謂之鮪渚成公子安大河賦云  
鱣鱧王鮪暮春來遊卽此也 洛汭洛水入河之  
處水經注云洛水東經洛汭北對琅邪渚入于河  
謂之洛口清濁異流皦焉殊別亦名什谷史記張  
儀說秦王下兵三川塞什谷之口是此也一云鞏  
縣鄠谷皆是也京相璠曰今鞏洛渡北有溇谷水

東入洛謂之下潯故有上鄆下鄆之名亦謂之北潯于是有南潯北潯之稱也 明谿水左傳昭公

二十二年晉軍于谿泉杜預注鞏縣有明谿泉又水經注云明樂泉今俗爲五道泉 小平縣城漢

縣廢城在今縣西北有河津曰小平津卽城之隅也 周王廟在縣界 鞏王廟在縣西二十里孝

義鎮西山立 大刀山神廟在縣北八里 青龍

山在縣西南十里 安陵與永昌陵並在縣西南

四十里 岐王墳在縣西南四十里 嵩山在縣

西南六十里



密縣東南一百里元四鄉古密國也亦鄗國之地左傳僖公六

年諸侯伐鄭圍新密漢為縣屬河南郡後漢卓茂

理此今縣東南三十里有古密城即漢理所兼有

卓茂祠尚存晉太和二年分河南置陽翟郡以密

縣屬焉高齊文宣移理于今縣東四十里故密縣

城為理後周屬滎州隋屬鄭州大業十二年又移

于今理即古法橋堡城唐武德三年于此置密州

四年州廢以縣屬鄭州卻隸河南府爾雅曰山如

堂者密因以為名方山山海經云浮戲之山汜

水出焉水經注云汜水出浮戲山世謂之方山也

大驪山在縣東南五十里水經注云大驪山卽具茨山也黃帝登具茨之山升于洪堤之上受神芝圖于黃蓋童子卽是山也莊子謂之具茨之山  
澗水源出于此 馬嶺山在縣南十五里洧水源出于此山有洧水在縣西南流合汜水入河 鄆水水經注云澮水出鄆城西北雞絡塢下東南流世亦謂之鄆水 瀝滴泉水經注云瀝滴泉出密縣深溪之側懸水散注故世以瀝滴稱 承雲水水經注云出承雲山二源雙導世謂之東西承雲

澗池縣

西一百五十里  
舊三鄉今四鄉

卽古池名秦趙所會之地漢

爲縣屬弘農郡今縣西十三里卽秦趙所會城猶存漢爲縣理于此城西三里今無基迹高帝八年復澗池中鄉民景帝中二年初城徙萬家爲縣莽曰陝亭周地圖記曰魏賈逵爲令時縣理蠡城按四夷郡國縣道記云漢澗池城當與澗池水源南北相對曹魏移于今福昌縣西六十五里蠡城後魏初猶屬弘農郡大統十一年又移于今縣西十三里故澗池縣爲理改屬河南郡周改屬同軌郡隋大業元年又移于今縣東二十五里新安驛置屬熊州十二年復移理大塢城唐貞觀三年自大



塢城移于今理兼立穀州後州廢爲縣今屬洛  
澠池史記張儀說趙王曰莫如與秦王遇于澠池  
面相見請按兵無攻于是趙惠文王秦昭王相會  
澠池秦王飲酒酣曰寡人竊聞趙王好音請奏瑟  
趙王鼓瑟秦御史書某年月日秦王與趙王會飲  
令趙王鼓瑟藺相如前曰趙王竊聞秦王善爲秦  
聲請奏盆缶秦王怒不許相如前進缶因跪請秦  
王秦王不肯擊相如曰五步之內相如請得以頸  
血濺大王左右欲刃相如相如張目叱之秦王不  
憚爲一擊缶相如顧趙御史書曰某年月日秦王

為趙王擊缶秦羣臣請以趙十五城為秦王壽相  
 如亦請以秦咸陽為趙主壽秦王竟酒終不能加  
 勝于趙趙亦設兵以待秦秦不敢動 穀水在縣  
 南二百步 俱利城秦趙二君會處今縣西有俱  
 利城一名秦趙城東城在縣西十三里西城在縣  
 西十四里水經注穀水東經秦趙二城南續漢書  
 云赤眉從澠池自利陽南欲赴宜陽是此地今俗  
 謂之俱利城以秦趙各據一城秦王擊缶趙王鼓  
 瑟俱稱有利名之 千秋亭在縣東二十里潘岳  
 喪子之處西征賦云天赤子于新安坎路側而瘞

之亭有千秋之號子無七旬之期又有水曰千秋

澗 天壇山在縣東北十八里高五百丈四絕如

壇後魏孝文帝西巡至此有天壇神 廣陽山在

縣東北二十里亦名澗池山 桓王山在縣東北

一百二十里 大媚山在縣東一百三十里有大

媚洞 穀山在縣南八十步 馬蹄泉在縣界

伍戶神在縣北一百二十里 禹廟在縣西二十

里 周桓王陵在縣東北一百二十里

緱氏縣 東南六十里舊三鄉今一鄉 古滑國也春秋云滑伯同盟

于幽鄭人入滑卽此也秦滅之後屬晉漢以爲縣



輿地志云因山以名縣漢屬河南莽曰中亭至宋  
 猶屬河南按此前緱氏縣在今縣東二十五里緱  
 氏故城後魏太和十七年省併入洛陽東魏天平  
 元年復以洛陽城中置緱氏縣後周建德六年又  
 自洛陽城移于今縣北七里鉤鎖故壘置隋開皇  
 四年又移于今縣北十里洛陽故郡城大業元年  
 復移于今縣東南十里置十年又移縣據公路澗  
 西憑岸為城唐貞觀十八年省上元二年又置今  
 迴向南近孝敬陵西置屬洛陽不改 洛水西自  
 洛陽縣界流入 緱氏山在縣東南二十里列仙

傳王子晉見桓良曰告我家七月七日待我于緱  
氏山頭果乘白鶴駐山巔望之不得到拱手謝時  
人而去山上有石室飲鶴池按盧氏嵩山記云覆  
釜堆亦名赴父堆卽緱嶺也 玉女山在縣東北  
三十五里 轘轅山在縣東南四十六里左傳謂  
樂盈過周王使候出諸轘轅杜注關名按轘轅道  
十二曲今置關焉又按辭綜注東京賦云轘轅坂  
十二曲道將去復還故曰轘轅漢河南尹何進所  
置八關此其一也 半石山在縣南十五里按山  
海經云半石之山其上有草焉生而秀其高丈餘

赤莖赤華華而不實其名曰嘉榮服之不畏雷霆

景山在縣東北八里曹子建洛神賦云經通谷

陵景山即此也 鄂嶺坂在縣東南三十七里晉

八王故事云范陽王保于鄂坂後于其上置關即

此地也 黃馬坂在縣西北十里戴氏西征記云

次前至黃馬坂去計索渚十里即此地也 半馬

澗按盧元明嵩山記云人或云半馬澗為百馬澗

亦曰拜馬澗古老傳王子晉得仙而馬還國人思

之不見乃拜其馬于此也上接佛光谷下徹公路

澗 靈皇塢一名延壽城盧氏嵩山記云此塢有



道士浮邱公接太子晉登仙之所也 袁術固一

名袁術塢在縣西南十五里四周絕澗甚險宋武  
北征記云少室山西有袁術固可容十萬人一夫  
守險千人莫當 柏谷塢戴延之西征記云塢在  
川南因原爲塢高數丈在縣東北姚洸部將趙元  
所守爲檀王所破塢西有二寺亦在原上入谷數  
百步又有二佛精巧美麗有牛舂馬簸水碓之利

古緱氏縣城在縣西北六里 鉤鎖壘在今縣

北七里按宋書武帝西征營于柏谷塢西卽此壘  
也有三壘相連如鎖因以爲名 公路壘公路澗

在縣西南三里有壘以袁術字公路而稱 少林

寺後魏孝文太和十九年立西域沙門號跋陀有

道業深爲高祖所敬信故制于少室山陰立少林

寺以居之公給衣供食 曹城在縣東十里曹操

與袁術相拒築城于此 古滑城在縣東一十八

里城東南角有招提寺 唐昭宗陵在縣東北五

里 百生墓在縣東十里後漢書獨行傳云周暢

字伯持性仁慈爲河南尹永初二年夏旱久禱無

應暢因收葬洛城傍客死骸骨萬餘人于洛水北

應時澍雨歲乃登今墓有千數皆相類對列成行

在洛城之東而北近洛水卽周暢之遺址也今號

百生墓 芝田鄉在縣北 啟母少姨廟在縣東

門外 王仙君廟在縣東八十里 百工神廟在

縣南八里岡上 九江娘子廟在縣南八十里

王子喬壇在縣東五里 則天行宮在縣北十里

仙鶴觀在縣東三里 賀蘭溪在縣南八里

雙泉在縣南十里 恭陵唐孝敬陵在縣東北五

里 古灰城在縣西北八里 鳳凰臺在縣南三

十里佛光谷內 武三思冢在縣西南十五里

潁陽縣東北九十本夏之綸國竹書紀年云楚及秦

太平寰宇記 卷之五 九



伐鄭圍綸氏是也漢置縣屬潁川後魏太和十三  
 年于綸氏城置潁陽縣屬河南郡後周省入堽陽  
 縣隋開皇六年改為武林縣十八年改為綸氏大  
 業元年改為嵩陽唐貞觀十七年廢咸亨四年入  
 河南洛陽伊闕嵩陽等縣又置武林縣開元十五  
 年九月改為潁陽縣 大碁山山海經云其陽狂  
 水出焉水多三足龜食之無大疾可以已腫 箕  
 山連互郡界 陽乾山在縣東二十五里按說文  
 云潁水出陽乾山 八風溪溪水南流合三交水  
 此岸有沙細潤可以澡濯隋代常進後宮雜以香

藥以當豆屑號曰玉女沙 三交水按水經注云  
三交水石上菖蒲一寸九節爲藥最妙服久化仙  
古武林亭按水經注云湮水西南流經武林亭  
倚箔山在縣北十五里望之如立箔山西北崖  
下有鍾乳隋時充貢 太谷口在縣西北三十五  
里孫堅停兵太谷距洛陽九十里卽此谷 太谷  
故關在縣西北四十五里何進八關此其一也  
一斗泉在縣西南十五里汲與不汲長有一斗  
勾龍本廟在縣北十三里 醴泉在縣西十步源  
出嶽廟下 七姑冢在縣西三十里 蠻王冢在

縣南二十里

王屋縣 西北一百里舊二鄉今三鄉 本周畿內地召公之邑平王

東遷亦為采地今縣西有康公祠六國屬魏漢為

河東郡垣縣地後魏皇興四年于此分置長平縣

屬邵州北齊置懷州後周武成元年州廢改為王

屋縣因縣北十里山為名仍于縣理置王屋郡天

和六年又于郡理立西懷州建德六年州省又為

王屋郡隋開皇三年罷郡以縣屬邵州大業三年

省州以縣入河內郡唐武德元年改為邵伯縣後

建都河洛顯慶二年復為王屋隸河南 王屋山



在縣北十五里尙書底柱析城至于王屋山在河  
東垣縣之北古今地名云王屋山狀如垣形故以  
名縣列子太行王屋二山方七百里高萬仞本在  
冀州之南河陽之北北山愚公者年且九十面山  
而居懲山北之塞叩石墾壤箕畚運于渤海之尾  
操蛇之神聞其不已也告之于帝帝感其誠命夸  
娥氏負二山一措朔東一措雍南神仙傳甘始太  
原人善行氣不食服天門冬療病不用鍼灸在人  
間三百歲乃入王屋山茅君內傳曰王屋山之洞  
周圍萬里名曰小有清靈之天 清靈洞有垂簷

峯 天壇山此山高登之可以望海 陽臺觀在

縣西北八十里 靈都觀在縣東三十里 齊子

嶺在縣東十二里卽宇文周與齊分境之所也

黃河在縣南五十里 野王城光武時寇恂所築

石室在縣西南七十里有石室卽夫子昔與及

門講論之所臨大河水勢湍急至此室五里之間

寂無水聲如似聽義之處 邵原在縣西南四十

里卽康公之采地也 析城山在縣西北六十里

峯四面其形如城有南門焉故曰析城 中條山

魏王泰地志云在縣西北九十里東接王屋山西

入絳州垣縣界 邵康公廟在縣西十五里輿地志云垣縣邵康公之邑春秋注云邵康公周太保邵公奭也

河清縣

北六十里元三鄉

本左氏所謂晉陰地漢爲平陰縣

屬河南郡按郡國縣道記云唐武德二年黃君漢鎮柏崖遂于柏崖東置大基縣八年省先天元年以諱改名河清縣貞觀中縣界黃河清因以爲名後廢至咸通中考功郎中王本立奏再置復隸河南府大順元年因干戈毀壞移在柏崖隙地權置皇朝開寶元年移在白波 河陰故城在縣東南



三十五里地理志云卽漢平陰縣左傳云晉師在平陰杜預注云今河陰縣是也 宋東垣縣在縣西南二十五里地理志云東垣宋屬河南郡 柏崖城在縣西三里臨黃河侯景所築唐高祖武德二年滑州人黃君漢以地歸乃屬懷州四年移懷州於河內縣乾元中太尉李光弼重修以拒史思明 冉耕墓在縣東南十七里孔子弟子也 後漢靈帝陵在縣東南三十里高十二丈 晉景帝陵在縣南三十里高六丈四尺 湯王廟在縣南三十里 柏崖廟在縣西北三十二里 堯廟在

縣西南八十五里 後漢光武廟在縣東南七里

貓兒山在縣西十里 吉水在縣西南六十里

瀟瀟水在縣西南六十里 金谷水在縣西南

六十里 迷仙崖在縣五十里 歇鶴臺在縣西

北三十里王子喬浮邱公遊王屋歇鶴于此 小

郎水在縣西四里

偃師縣

東北七十里元三鄉

本漢舊縣帝嚳及湯盤庚並都之

商有三亳成湯居南亳卽此也至盤庚又自河北

徙理于亳殷商家從此改號曰殷故殷有天下此

爲新都故城在今縣西十里周武王伐紂回息偃

師戎遂名偃師周爲畿內之邑秦屬三川漢屬河南卽今縣理是也晉併入洛陽隋開皇十六年復置北邙山在縣北二里首陽山在縣西北三十五里阮籍詩云步出上東門北望首陽岑下有採薇士上有嘉樹林山上今有夷齊祠按後魏正光元年夏首陽山晚有虹飲于溪樵人楊萬見之良久化爲一美女乃竊告蒲津戍將宇文顯顯取之進明帝帝見容貌姝美掩于六宮或問之曰我天女也暫降人間帝欲逼幸其色甚難乃令左右擁抱作異聲如鐘復化爲虹經天而去後帝尋崩



魏文帝廟在縣西北十八里。魏文帝陵在首陽山南。杜預墓在首陽山南。乾脯山九州要記云周敬王于此曝乾脯因以爲名。覆舟山九州要記云昔盧世明登嵩嶽望覆舟如蟻垤黃河如帶又陶李述京邦記云周迴二十里下有林號白水苑是也。尸鄉劉澄之永初山川記云尸鄉有石室有仇生者居焉又云祝雞翁者洛陽人居尸鄉山下養雞百餘年。盟津在縣西北三十一里河東經小平縣俗謂之小平津河南岸有鉤陳壘河于斯有盟津之目昔武王伐紂諸侯不期而

會者八百故曰盟津亦曰富平津 廢北陂義堂

路此古大驛路唐天寶七年四月河南尹韋濟奏

于偃師縣東山下開驛路通孝義橋故此路廢矣

曲洛穆天子傳云天子東遊于黃澤宿于曲洛

今縣東洛北有曲河驛以洛水之曲爲名洛經其

南續齊諧記云晉武帝問尙書郎摯虞曰三月初

水其義何指荅曰漢章帝時平原徐肇以三月初

生三女至三日俱亡一村以爲怪乃攜之水濱盥

洗遂因水以流觴曲水之義起于此帝曰若如所

談便非好事尙書郎束皙曰摯虞小生不足以知

此昔周公成洛邑因流水以泛酒故逸詩曰羽觴  
隨波又秦昭王三日置酒河曲見有金人出奉水  
心劍曰令君制有西夏及秦霸諸侯乃因此處立  
爲曲水祠二漢相緣皆爲盛集帝曰善賜金五十  
斤左遷虞爲陽城令 洛洞劉義慶幽明錄曰洛  
下有洞昔有婦人推其夫下崖乃得一穴行百餘  
里覺所踐如塵啖之裏以爲糧行至交州以問張  
華華曰洛洞仙人所處在縣東南 故平縣城漢  
平縣故城也在今縣西北二十五里 湯王廟在  
縣東三百四十八步 湯王陵坑在縣東北山上



八里 湯王聖母廟在縣西三里 舜王廟在縣

西北二十里 周王廟在縣西二十五里 薄妃

廟在縣西十五里 伊尹墓在縣西北五里 比

干墓在縣西北一十五里 田橫墓在縣西十里

王弼墓在縣南三里 鍾繇墓在縣東八里

啟母少姨行廟在縣西南二十五里 杜預墓在

縣西北山上二十里 割乳冢在縣西二十五里

校勘

河南府

鞏縣

按史記周惠公封少子於鞏無歲月無名  
今所載蓋參以皇甫謐帝王世紀而言之  
又云皇甫謐云以王城爲東周以鞏爲西  
周今世紀無此文攷之帝王世紀前後所  
載當云皇甫謐以王城爲西周鞏爲東周  
今記恐舛誤又云其子武公爲秦所滅按  
史記注西周武公卽惠公之長子計其襲  
封距周滅之年甚遠今云武公爲秦所滅  
史記世紀皆不載未知所本恐亦誤書

潁陽縣

三交水

按水經洛水注有三交水不見菖蒲事今  
記引水經而今水經無其文者非一或恐  
近世水經本脫遺耳

太平寰宇記卷之五終



太平寰宇記卷之六

河南道六

陝州

虢州

陝州

陝州

陝郡今理陝縣

禹貢為冀豫二州之域郡夾河河南諸

縣則豫州域河北則冀州在周即二伯分陝是亦

為虢國之地春秋時為北虢上陽城即今平陸縣

是也又有焦國故七國時為魏地史記魏襄王六

年秦取我焦是也後屬韓秦屬三川漢為弘農郡

之陝縣自是至晉因之後魏太和十一年置陝州

及恆農郡于此十八年又罷孝武永熙中再置大  
統三年又罷後周明帝又置武帝改弘農爲崤郡  
州如故兼屯兵于此備北齊隋初郡廢而州存大  
業初又廢州以其地併入河南郡仍置弘農宮于  
此以備巡幸義寧元年又改爲弘農郡領陝崤桃  
林長水四縣二年省崤縣唐武德元年改爲陝州  
總管府管陝鼎熊函穀五州仍割長水屬虢州其  
年復立崤縣二年復割崤縣屬函州三年又置南  
韓州嵩州並屬陝府四年東都平割熊穀嵩三州  
屬洛州總管其年罷洛州總管復以熊穀嵩三州

來屬仍省南韓州入洛州八年廢函州以嶠縣來屬貞觀元年罷都督府又以廢芮州芮城河北二縣來屬十四年改嶠縣爲硤石縣大足元年割絳州之夏縣來屬尋卻還絳州天寶元年改爲陝郡置軍至德二年十月收兩京乾元元年復爲陝州因割蒲州之解安邑絳州之夏縣來屬仍改安邑爲虞邑廣德元年十月吐蕃犯京師車駕幸陝州乃以陝爲大都督府天祐初昭宗遷都洛陽駐蹕陝州改爲興德府爲次譏赤哀帝卽位省復爲大都督府至皇朝爲保平軍節度



元領縣六

今八

陝縣

芮城

平陸

靈寶

硤石

夏縣

閿

鄉

虢州割到

湖城

虢州割到

州境

東西二百七十里

南北二百六十五里

四至八到

東至東京七百二里

東至西京三百五十里

西至長安四百六十九里

東至河南府永寧縣一百一十六里

南至虢州玉城縣一百四十里

西至華州華陰縣界二百二十五里

北至絳州二百二十里

西南至虢州九十六里

東南至河南府永寧縣界一百六十里

東北至解州聞喜縣二百四十里

西北至絳州二百二十里

戶

唐開元戶四萬七千三百二十二

皇朝戶主萬二千五百四十四客四千八百九十

九

風俗

漢書地理志云韓地也子男之國號會為大恃執

與險崇侈貪冒

人物

傳說

宮之奇

段干木

皆陝人

焦先

唐上官

儀

陝州人相高宗

姚崇

破石人為開元名相姪孫問為城父令與張巡同守睢陽官尚

書郎

土產

柏子仁

貢

瓜萇根

貢

絕

絹

麝香

蕤仁



石膽

陝縣

舊六鄉  
今五鄉

本漢縣屬弘農郡後魏初改爲陝中縣

屬弘農不改至太和中立郡于此女几山九州

要記云富祿縣有女几年八十居陳留沽酒得道

後飛昇于此山因名之金門山有竹可爲律管

溫湯在縣南十六里後周太守元楷掘井得泉

極熱遂修爲浴水黃河自靈寶界流入後漢書

云獻帝歸至陝議者欲令天子浮河東下太尉楊

彪曰臣弘農人從此以東有三十六灘非萬乘所

當從也乃止周地圖記云城西北角河水湧沸方

數十丈聲聞數里俗云石季龍載銅翁仲所沒處  
水雖漲滅翁仲頭髻常與水齊晉劉裕軍至髻忽  
沒至今不復出史記云秦始皇鑄金人十二董卓  
毀其九爲錢其在者三魏明帝欲徙于洛陽重不  
可勝至灞水西停之石氏取置鄴宮至苻堅又徙  
長安其一未至而苻氏亂百姓推至陝北河中于  
是金狄滅矣 灞水卽魯水也隋文帝遣蘇威引  
灞水西北入城百姓至今賴之呼爲利人渠又按  
唐史云武德元年陝東道行臺金部郎中長孫操  
自郡東又引水入城以代井給百姓賴之與上渠

俱利于民 曹陽墟俗名七里澗在縣西四十五里後漢書獻帝東遷李傕郭汜等追乘輿戰于弘農東澗天子幸曹陽墟次田中是此地也今澗謂曹陽澗魏武改爲好陽澗 故虢焦二城左傳謂虞虢焦滑霍楊韓魏皆姬姓此二城爲晉所滅故城在今縣東北百步 曲沃左傳文公十三年晉侯使詹嘉處瑕以守桃林之塞水經注云晉侯以曲沃之官守之故有曲沃之名 太陽故關在縣西北四里後周大象元年置卽茅津也一名太陽津後漢書謂獻帝北渡太陽津是此處 河上公



廟在州西五里唐神龍二年皇帝親謁朝廷有麟  
跡見 墨池後漢書云張芝字伯英少好書所居  
池水迄今尙有遺跡 邵伯祠在縣東三里唐大  
厯七年重置 虢山在縣西三里史記云魏文侯  
二十六年虢山崩壅河注云在陝 晉靈公臺在  
縣西南三十二里左傳晉靈公不君厚斂雕墻登  
臺彈人卽此也俗號女臺高五十餘尺 望仙臺  
在縣西南十三里漢文帝親謁河上公公旣上昇  
故築此臺以望祭之 州理城卽古之虢國城西  
征記陝縣周召分職處城南倚山原北臨黃河懸

水百餘仞臨之者悚慄 太原倉在縣西南四里  
隋開皇二年置以其北臨焦水西倚大河地勢高  
平故謂之太原周迴六里 徽伯故壘在縣南二  
里高歡使李徽伯戍陝周太祖攻之徽伯築壘于  
此拒太祖 太陽橋在縣東三里唐貞觀十一年  
太宗東巡遣右武侯將軍邱行恭營造

芮城縣

西北九十三里  
舊六鄉今二鄉

古魏國附庸邑今縣西二十

里有芮城史記芮國在馮翊界魯桓公三年芮伯  
萬爲母姜氏所逐遂居于魏爲晉所滅今芮城是  
也今縣北五里有魏城卽畢萬所封漢以其地爲

河北縣屬河東郡姚秦于此置河北郡後魏太和十一年自此移郡于太陽城後周明帝二年自縣東十里移安戎縣于此置尋改爲芮城縣因古芮城爲名唐武德二年于此置芮州貞觀元年州廢縣隸陝焉 涇水津水經注云河北縣有涇水涇澤其水南入于河河水故有涇津之名穆天子傳云天子自賓輪次于涇水之陽丁亥入于南鄭陳平祠在縣東北二里平葬中條山蒲陰縣城西門也八世孫漢魏郡太守陳康于此分居乃立祖廟令宗族祭祀 陳平北廟在縣北十五里按碑



文云二十六世孫陳處靜以唐武德四年從故墓  
自南遷北此廟有碑二古柏森然 太公祠在縣  
東南呂坡二十五里周太師封于齊三十君呂德  
仁晉泰始元年出爲河北郡太守今縣北有河北  
故城至後秦弘始十六年隴西太守呂凭創基立  
廟有二碑見在 芮王廟在縣西二十里古芮城  
內周司徒封于芮爲虞之附庸國也梁開平初感  
夢于天庭再立祠廟 中條山在縣北十五里高  
八里自河中府東至當州靈寶縣界次入平陸縣  
南望太華北瞻壺口此山薄狹而延袤故謂之中

條亦曰薄山東至王屋又至太行入于海 薄山  
在縣北十里按山海經云蒲山之首曰甘棗之山  
其水出焉西流注于河穆天子傳云登薄山竇輪  
之陘此乃起自薄坂又名首陽山邈迤連延東至  
太行入海南北狹薄謂之薄山史記封禪書云自  
華以西名山七薄山卽其一也 方山一名雷首  
山在縣西北二十七里按地理志云河中府有地  
方名陰崖注云方山在其南卽此按尙書禹貢壺  
口雷首至于太華雷首卽此山也與二華爭高峰  
巒巖翠 龍泉水在縣北七里水經注云古魏城

內有龍泉南流出城源闊五寸深一寸 古芮城  
在縣西二十里按秦誓注云周自虞芮質成諸侯  
並附芮伯作旅巢命注云芮伯周同姓圻內之國  
爲卿大夫左傳注云芮國在馮翊臨晉縣也 古  
魏城縣北五里按左傳云霍楊韓魏皆姬姓又毛  
詩國風云糾糾葛屨可以履霜摻摻女手可以縫  
裳刺魏地狹隘人多機巧其君儉嗇而徧急賣圃  
之菜食園之桃以理國人焉省賦稅尙車甲北瞰  
汾水東臨晉境至魯閔公元年爲晉獻公所滅晉  
作二軍畢萬爲右滅魏遂以賜之十偃曰畢萬之



後必大萬盈數魏大名也三卿分晉萬之子孫復  
爲魏國後爲強秦所逼東遷于梁魏有公子無忌  
用侯嬴之計使朱亥袖鎚殺晉鄙而奪其軍北救  
趙後秦伐魏信陵自趙率五國之兵大破秦軍退  
至函谷始皇二十二年滅其國以爲郡縣其城周  
迴八里年代綿遠遺址猶存 畢萬墓在縣東北  
一十三里按地理志云魏城東五里有魏之祖墓  
高一丈 段干木墓在縣東北十五里按史記魏  
文侯過段干木廬必式卒葬古魏城東墳高三丈  
有祠存唐貞觀十年勅禁樵採 郤芮墓在縣西

三里按左傳僖公二年四月晉侯潛會秦伯于王城瑕甥卻芮焚公宮不獲公乃如河上秦伯誘而殺之葬于此子缺服喪營壘三年初白季使過冀見芮之子缺耨其妻饁之相敬如賓與之歸言諸晉文公曰能敬必有德德能治民請公用之公曰其父有罪可乎對曰舜之罪也殛鯀其舉也興禹詩云采葑采菲無以下體君取節焉可也文公乃命缺爲下軍大夫復與之冀還其父故邑今晉州冀氏縣是也

平陸縣

北五十里舊十鄉今五鄉

本漢大陽縣地屬河東郡後

漢改爲河北縣地屬亦不改後魏太和十一年自  
今芮城縣界故魏城移河北郡理于此周武帝天  
和二年省大陽縣仍自故魏城移河北縣于郡理  
隋開皇三年罷郡以縣屬陝州唐天寶元年陝州  
太守李齊物鑿三門山路所通深便于漕運于所  
開瀆中得古鑄鉏甚大上有古篆平陸二字由是  
其年二月改爲平陸焉 吳山俗謂虞坂自上及  
下七山相從在縣北五十里漢地理志大陽縣西  
有吳山卽吳坂也楚客謂春申君曰昔騏驥駕鹽  
車上吳坂遷延負轅而不能進遇伯樂解而馱之



于是俯而噴沫仰而鳴以伯樂之知己也今僕居  
輓之日久矣君獨無意使僕爲君長鳴乎 閑原

詩云虞芮質厥成文王蹶厥生毛萇注云虞芮之  
君相與爭田久而不平乃相謂曰西伯仁人盍往  
質焉及境見行讓路耕讓畔咸相謂曰我等小人  
不可以履君子之庭乃相讓所爭之地以爲閑田  
而返天下聞之歸周者四十餘國原在縣西六十  
里東西七里南北十三里 顛軫坂今謂之軫橋  
在縣北四十里卽左氏冀爲不道入自顛軫 黃  
河去縣二百步 傳說祠在縣東北二十里尙書

高宗夢得說使百工營求諸野得諸傅巖注云傅氏之巖在虞虢之界水經注云沙澗水北出虞山東南經傅巖今穴在隱窟即水西縣崖去水一丈立祠焉咸亨二年詔修說祠以少牢致祭 沙澗在縣東三十里水經注云沙澗水北出虞山東南經傅巖歷傳說隱室前俗名聖人窟 故虞城在縣東北六十里按地理志吳山有城左傳晉荀息請以屈產之乘與垂棘之璧假道于虞以伐虢即此城也 鄭城鄭音冥在縣東北二十里左傳僖公二年晉荀息曰冀為不道入自顛軫伐鄭三門杜

注云河東大陽縣有顛輪坂又注云晉伐虞至鄭  
鄭虞邑也其城周四里 瑟瑟窟在縣西北四十  
里

靈寶縣

西四十五里舊  
八鄉今三鄉

本秦桃林縣漢爲弘農縣地

按漢縣在今縣西南二十里函谷故關城是也隋  
開皇十六年于今所置桃林縣屬陝州取古桃林  
塞爲名唐開元末其地得天寶靈符因改元天寶  
兼改此縣爲靈寶焉 門水俗名鴻臚澗 柏谷  
水亦名磐澗水經云河水又東合柏谷水注云水  
出弘農縣南石堤山 桃林塞山海經云夸父之



山其北有林名曰桃林廣員三百里多馬湖水出焉北流注于河其中多珣玉造父于此得驊騮騂耳之乘獻穆王尚書謂放牛桃林之野左傳謂以守桃林之塞其地則自縣以西至潼關皆是也三秦記桃林塞在長安東四百里若有軍馬經過好行則牧華山休息林下惡行則決河漫延馬不得過矣 曹陽城在縣東南十四里陳涉使周文西入秦秦使章邯擊破之殺文于曹陽城卽此後曹公改爲好陽 晉王斜路卽漢書地理志函谷關路也西接湖城縣東至此縣界六十一里已廢開

皇九年晉王自揚州回復此路因名晉王斜路至  
今不絕 黃河在縣西北五里 古函谷關在縣  
南十里一百六十步秦之舊關也孟嘗君田文被  
逐夜半關閉下客爲雞鳴而得出之處也漢高祖  
入武關居灞上閉函谷關不納項王亞父怒燒關  
門又漢樓船將軍楊僕立大功恥爲關外民請以  
家僮七百人助築關城武帝意好廣闊遂東移于  
新安以其故關爲弘農縣也地理志云弘農故函  
谷關也崔浩注云東自崤山西至潼津通名函谷  
號曰天險所謂秦得百二戴延之西征記云舊函

谷關帶函道漢書纂云道形如函也酈善長水經  
 注云門水北經弘農縣故城東城即故函谷關校  
 尉舊治處終軍棄繻之所老子西入關尹喜望氣  
 于此也王元說隗囂請以一丸泥東封關亦此處  
 也三秦記云函谷關去長安四百里日入則閉雞  
 鳴則開秦法也又晉地道記云漢弘農本函谷關  
 有桃林也潘岳西征賦云躡函谷之重阻即此關  
 也其城北帶河南依山周迴五里餘四十步高二  
 丈唐天寶元年于尹真人舊宅所掘得靈寶符遂  
 立靈寶縣于此 稠桑澤在縣西十八里按山海



經云桃林地方三百里此澤卽古之桃林也春秋  
云虢公敗戎于桑田杜注云桑田虢地在弘農陝  
縣東北蓋此也 細腰原在州西南七十九里東  
西闊三里南北長十里當中五十步俗傳云中心  
狹細如束素之腰故名 尹喜臺在縣南十二里  
關龍逢墳在縣西南七里城冢記云關龍逢葬  
在龜頭原左脇高三丈唐太宗東巡致祭開元十  
三年立碑舍人吳鞏之詞 楊駿五公墓在縣東  
南十五里晉陽秋云惠帝永平元年殺太傅楊駿  
并父及子孫九人故吏潘岳等收葬之

碭石縣東南五十里舊六鄉今三鄉本漢陝縣地屬弘農郡周地

圖記後魏太和十一年分陝縣東界于冶盧置嶠

縣在冶之郊屬弘農郡取嶠山為名隋初改為碭

石縣大業二年廢入陝縣唐義寧元年再置嶠縣

理碭石塢二年省武德元年再立三年移理鴨橋

故鎮貞觀八年移于安陽城十四年移于碭石塢

西即今縣是也至皇朝乾德五年割河南府永寧

縣胡郭一邨屬焉底柱山俗名三門在縣東北

五十里黃河中禹貢導河積石至于龍門東至于

底柱注云河水分流包山而過山見水中若柱然

也又以禹理洪水山陵當水者破之以通河三穿  
既決河出其間有似門故俗號三門漢成帝鴻嘉  
四年楊焉上言砥柱之隘可鑿廣之上乃令鑿之  
才沒水中不能復去而令水益湍怒爲害彌甚隋  
開皇三年遣倉部侍郎韋瓚自蒲陝以東募人能  
于洛陽運米四十石由砥柱之險達于常平者免  
其征戍唐貞觀十二年太宗東巡臨幸于此今有  
魏徵所勒碑銘在 繡嶺宮在縣東三里 硤石  
水在縣東二十里水出上嶺西經硤石山因名與  
囊水合流 二陵在縣東北四十六里春秋云嶠



有二陵焉南陵夏后皋之墓北陵文王避風雨之所峭在弘農澠池縣西北道在三峭之間兩山相嶽文王避風雨古道猶存其地原屬河南永寧縣乾德五年割屬當縣 虢城在縣西三十六里左傳僖公五年晉侯圍上陽杜注云上陽虢國都在弘農陝縣東南漢地理志陝縣故虢國北虢在大陽東虢在滎陽西虢在雍州今陝縣東卽北虢也安陽城在縣西四十里漢書上官桀侯封之國潘岳西征賦云我徂安陽言陟陝鄂唐貞觀八年移峭縣在此城內置十四年移治向南改名硤石

縣城今廢 神雀臺在縣東北四十五里石壕鎮  
東路北唐天寶二年赤雀翔于臺上因名臺高五  
十尺周半里 莘原在縣西十五里左傳莊公三  
十二年有神降于莘杜注莘號地 廢陝內縣在  
縣南四十里廢入硤石縣

夏縣 北九十九里舊十一鄉今七鄉 本漢安邑故地魏孝文太和元

年析安邑縣置夏縣以夏禹所都之地為名屬河  
東郡後周建德七年移于此地義寧初屬虞州貞  
觀十七年隸絳州乾元三年屬陝州 巫咸山一  
名覆輿山水經注云鹽水西北流經巫咸山北山

海經云巫咸國在女丑北右手操青龍左手操赤蛇在登葆山羣巫所從上下也又引大荒西經云大荒之中有靈山巫咸巫卽巫盼巫彭巫姑巫眞巫孔巫抵巫謝巫羅十巫從此昇降百藥爰在又引郭景純云羣巫上下靈山採藥往來也蓋神巫所遊故山得名矣 夏宮夏靜與洛下人書云安邑禹舊宮有石殿金戶丹庭紫宮俗人名爲驪姬故房今無基址 夏禹臺在縣西北十五里土地十三州志云禹娶塗山氏女思本國築臺以望今城南門臺基猶存夏靜與洛下人書曰安邑塗山



氏臺俗謂之青臺上有禹祠 巫咸祠在縣東五里巫咸山下卽商臣也 中條山在縣界東西一百二十里 皇川在縣東南五十五里中條山內耆舊相傳夏后離宮避暑之所 涑川在縣北四十里從聞喜縣界接河中猗氏縣東北有青原南距安邑沃野彌望一百餘里左傳成公十三年晉侯使呂相絕秦曰伐我涑川 古安邑城在縣西北一十五里按地理志云夏禹自平陽徙都安邑後徙晉陽皇甫謐曰禹受禪都平陽遷安邑也

閩鄉縣

西一百七十里舊五鄉今六鄉

本漢湖縣屬京兆尹因津以

名邑焉又為戾園之地有思子臺太子園陵存焉  
周明帝二年於湖城故地置闕鄉郡隋開皇三年  
廢十六年自湖城故城移于今理仍改為闕鄉縣  
唐貞觀元年移鼎州于此八年州廢為縣復屬虢  
皇朝太平興國二年割闕鄉湖城二縣隸陝州

秦山一名秦嶺山在縣南五十里山海經云華山  
之首有錢來之山又西四十五里有松果山又西  
六十里有大華山郭氏注云即西嶽華陰山也又  
按夸父山其北有桃林郭注桃林在今弘農湖縣  
闕鄉南谷中是也 黃河在縣北三里 闕鄉津

去縣三十里卽舊風陵關 蒲城子路爲孔子問  
津之所 黃卷坂卽潼關路述征記云河自關東  
北流水側有長坂謂之黃卷坂是也按坂在縣西  
北二十里潘岳西征賦云溯黃卷以濟潼謂此古  
道爲車轍所輾成 玉澗水經云河水入東北玉  
澗水注之注云水南出玉溪北流經皇天原 女  
媧墓自秦漢以來皆係祀典唐乾元二年虢州刺  
史王奇光奏所部闕縣界有女媧墓於天寶末失  
其所在今月一日夜河上側近忽聞雷聲曉見墓  
湧出上有雙柳樹下有巨石其柳各高丈餘 戾



太子陵在縣南十六里高百五十尺 思子宮故

城在縣東北二十五里漢武思戾太子所築 全

鳩水一名全節水戾太子亡匿處 宋武七營宋

高祖征姚泓于長安其將檀道濟王鎮惡濱河帶

險大小七營皆在縣西沿河 赫連氏京觀在縣

西北二十三里俗號平吳臺赫連勃勃使太原公

昌引兵攻宋將朱齡石于潼關克之乃築臺以表

武功也

湖城縣

西九十里舊六鄉今二鄉

漢縣屬京兆尹舊曰胡建元元

年更爲湖卽今縣西北二里古胡城也按郊祀志

黃帝以首山之銅鑄鼎于荆山之下後名其地爲  
鼎湖卽此邑後魏改爲湖城縣隋開皇十六年廢  
義寧元年于古上陽宮再立乾元三年二月改爲  
天平縣八年移于上陽宮東南一里卽今理大厯  
四年復爲湖城縣 荆山在縣南出美玉卽黃帝  
鑄鼎之所故有鼎湖之稱 颺堆形如聚粟故人  
呼爲颺堆 鳳林泉後漢辛繕字公文隱居華陰  
有大鳥雞首燕鷓魚尾蛇頸五色而多青棲于門  
之槐上因名鳳林泉 周天子祠四夷縣道記周  
天子故祠在縣西南十里卽漢志注有二祠存

夸父山在縣東南三十五里 九龍廟在縣南十  
九里廟有九泉大小相類深淺無異其色清澈毛  
髮可鑑若逢亢旱祈禱此廟應若影響

### 號州

號州

弘農郡今  
理弘農縣

禹貢當雍豫二州之境春秋爲號國

地按帝王世紀云故號有三焉周興封號仲于西  
號此其地也封號叔于東號卽今成皋陝郡平陸  
縣是北號此謂三號焉春秋魯僖公二年爲晉所  
滅卽荀息請以屈產垂棘假道以伐者也國亡地  
入晉七國時爲秦韓之疆秦併天下爲三川郡後



立河南南陽二郡漢地理志元鼎四年丞相論廣  
關中地又樓船將軍楊僕恥爲關外人于是徙關  
于新安割秦河南南陽二郡之西境于故函谷置  
弘農郡并弘農縣義取弘大農桑爲名以屬司隸  
後魏避獻文諱改爲恆農郡至太和十一年移郡  
理陝城永熙三年分恆農西界又爲西恆農郡後  
周明帝廢西郡併入元郡仍改恆農爲弘農隋開  
皇三年廢郡以所領縣並屬陝大業二年廢陝州  
又以弘農縣復立郡卽理于今州西古城其年冬  
又移郡于鴻臚川卽今郡理也義寧元年改爲鳳

林郡其年又于盧氏縣置號郡唐武德元年改號郡爲號州仍改鳳林郡爲鼎州乃自弘農移理闕鄉縣貞觀八年廢鼎州自盧氏縣移號州于今理屬河南道開元初以巡按所便屬河東道天寶元年改爲弘農郡乾元元年復爲號州今仍屬河東道後漢劉昆爲太守初多虎災月餘皆負子過河而去

元領縣六

今四

恆農 朱陽 盧氏 玉城

二縣割出

闕鄉 湖城 並入陝州

州境

東西一百六十里

南北一百一十四里

四至八到

東至東京七百六十里

東至西京四百五十五里

西北至長安四百三十里

南至鄧州七百里

西至華州二百三十五里

北至絳州三百四十里



九平寰宇記 卷之六  
東北至陝州一百三十三里

東南至汝州五百一十里

西南至商州三百七十里

西北至潼關一百三十里

自潼關至華州一百二十里又至河中府一百八十三里

戶

唐開元戶一萬七千七百四十三

皇朝戶主四千四百七十三客四千六百七十九

風俗 同陝州

姓氏

恆農郡五姓 楊 劉 强 晉 奚

人物

董遇

弘農人自云讀書百遍其義自見為大司農

王濬

弘農人為晉龍驤將軍平

吳

唐宋之問

弘農人

土產

方紋綾

貢

花紗

絹

梨

棗

硯瓦

麝香

蜜 黃丹

恆農縣

舊八鄉今四鄉

本秦桃林縣地漢武置弘農縣于秦

故函谷關衙山嶺下注云函谷者謂道形如函孫

卿子謂秦有松柏之塞卽此地也隋大業二年省  
弘農縣三年復于今湖城縣西南一里上陽宮南  
置尋移縣就郡理其年又與郡同移于鴻臚川卽  
今縣理是也唐神龍元年改弘爲恆開元初復爲  
弘後漢公沙穆爲令初多蟲災害稼穆以身禱一  
夕蟲爲暴雨所斃歲成大稔至皇朝建隆三年改  
爲恆農避廟諱 衙山嶺在縣西南三十五里漢  
地理志弘農縣衙山嶺下谷爚水所出 鹿跡山  
九州要記云弘農縣有鹿山山中石上有自然鹿  
跡非人功所爲 石隄山在縣西南十七里水經



注云柏谷水出弘農縣南石隄山下有石隄祠焉  
西連華山 伏犢山在縣西南二十八里東接嶠  
函西連仙掌 扇子山九州要記云山石壁中分  
其形似扇故名之 黃河在縣西十五里 鴻臚  
川一名鴻臚澗一名門水在縣西一里西南自朱  
陽縣界入漑田四百餘頃水經注云卽山海經所  
謂陽華之山門水出焉者也又東北歷陝謂之鴻  
關水東有城卽關亭也 柏谷亭漢文帝微時常  
遊于此按九州要記云楊震宅在柏谷亭 柏仁  
驛漢高獲貫高之所 楊震宅按後漢書震四世

五公為關西大儒即郡人也號關西孔子 王濬

冢仕晉平吳有功卒葬于此而冢尚存

朱陽縣 西南七十里舊五鄉今四鄉 本漢盧氏縣地按十州記盧

氏有朱陽山因別立縣後魏太和十四年蠻人樊

磨背梁歸魏魏于今盧氏縣南一百五十里立朱

陽郡以樊磨為太守孝昌二年省郡大統二年又

立屬東義州仍于理所置朱陽縣以屬焉後周保

定二年省郡大象二年移縣于今盧氏縣西南隔

堰一作渠谷中隋開皇四年移理洛水北大業二年

移于芹池川即今縣也至皇朝乾德六年併入恆

農縣太平興國七年再置 地肺山山有神祠卽  
肺祠也 柏谷古有白石先生隱此山得仙今有  
遺跡尙多焉 鴻臚水經縣南一百五十步

盧氏縣

東南一百六十里依舊二鄉

漢縣屬弘農郡後屬虢今不

改郡國縣道記云縣則西虢之別邑按遁甲開山  
圖云盧氏山宜五穀可以避水災因山以名縣後  
魏大統中于此立東義州隋開皇三年改爲虢州  
大業三年廢州義寧元年又置虢郡武德元年改  
爲虢州貞觀八年州移理弘農此爲屬邑 熊耳  
山按漢地理志盧氏縣熊耳山伊水出東北入雒



在今縣南五十里按遁甲開山圖云熊耳山有金  
匱石室夏禹藏圖書之所尚書導洛自熊耳孔安  
國云在宜陽之西乃樊崇積甲之所是知有兩熊  
耳山以其兩峰相對似熊耳故也 洛水經縣南  
兜鍪山自商州洛南界邈迤向縣西卻入朱陽  
山去縣一百四十里形似兜鍪 朱陽山自兜鍪  
山邈迤向縣西南經縣界入西石門山去縣百里  
出檀木為弓材 西石門山自朱陽邈迤向縣西  
界入熊耳山去縣十里山形似門

玉城縣

東南六十里舊五鄉今三鄉

本盧氏縣地後魏正始二年

分盧氏縣地于今縣東南十五里立石城縣屬安樂郡廢帝元年改石城爲玉城縣以隸虢因荆山之石有玉而美故以名之後周天和六年廢義寧元年于今縣西北一百五十步再置因後魏舊名貞觀八年移于今理 五陽水在縣西十五里北流與關方水合 鹿跡山在縣西南二里

校勘

陝州

芮城縣

太公祠周太師封于齊三十君呂德仁晉泰

始元年出爲河北郡太守

按三十君呂德仁諸本皆同未詳其說或紀其世次而訛脫耳又晉書地理志但有河東郡至後魏方爲河北郡今恐是河東太守

### 夏縣

按後魏地形志河北郡有北安邑縣注云二漢晉屬河東郡又有南安邑縣注云太和十一年置故元和郡縣志云本漢安邑縣地屬河東郡後魏太和十一年別置安



邑縣十八年方改爲夏縣頗爲有據今記  
云魏太和元年析安邑縣置夏縣所書之  
年旣誤所紀置縣亦脫略

### 湖城縣

乾元三年二月改爲天平縣八年移于上陽  
宮東南一里

按乾元盡三年四月今云八年移治恐誤  
或脫文也

太平寰宇記卷之六終